



Broj/Број:01/7-50-1-53-3-13/04
Sarajevo/Сарајево: 31.03.2004.

ZAPISNIK

sa 13-e vanredne sjednice Administrativne komisije Predstavničkog doma Parlamentarne skupštine Bosne i Hercegovine, održane u prostorijama institucija Bosne i Hercegovine dana 31.03.2004 godine sa početkom u 14 sati i 40 minuta. Sjednica je završena u 15 sati.

SJEDNICI SU PRISUSTVOVALI ČLANOVI KOMISIJE: Jusufović Munib, Vinko Zorić, Nikola Kragulj, Hazim Felić, Novaković Momčilo, Blagojević Mirko;

OPRAVDANO ODSUTNI ČLANOVI KOMISIJE: Križanović Jozo;

ODSUTNI ČLANOVI: Džaferović Šefik, Ivo Miro Jović;

OSTALI PRISUTNI: Hadžović Vedran, Sekretar Zajedničke službe Sekretarijata Parlamentarne skupštine Bosne i Hercegovine; Korać Jadranka, Rukovodilac Računovodstva Zajedničke službe Sekretarijata Parlamentarne skupštine Bosne i Hercegovine;

Trinaestom vanrednom sjednicom, Administrativne komisije Predstavničkog doma Parlamentarne skupštine Bosne i Hercegovine, **predsjedavao je Munib Jusufović.**

Za sjednicu je predložen:

DNEVNI RED:

1. Usvajanje Zapisnika sa 12-e sjednice Administrativne komisije;
2. Donošenje Odluke o izmjenama Pravilnika o plaćama i naknadama državnih službenika i zaposlenika u Sekretarijatu Parlamentarne skupštine Bosne i Hercegovine broj: 01,02/3-02-432/01 od 03. jula 2001 godine;
3. Izmirenje obaveza iz 2001 godine prema Hotelu "Holiday Inn";

Prisutni članovi, Administrativne komisije Predstavničkog doma Parlamentarne skupštine Bosne i Hercegovine su jednoglasno usvojili predloženi dnevni red. Pošto je usvojen dnevni red, pristupilo se razmatranju istog, po pojedinim tačkama.

Ad-1 U okviru ove tačke dnevnog reda, Vinko Zorić se pozvao na član 17 i 42 Poslovnika Predstavničkog doma Parlamentarne skupštine Bosne i Hercegovine. Istakao je, da on neće više raditi u Administrativnoj komisiji ukoliko se pitanje preraspodjele prostorija za rad Klubova

poslanika nestavi na dnevni red jedne od sjednica Administrativne komisije. Po pozivanju na citirane odredbe Poslovnika, predsjedavajući Administrativne komisije Munib Jusufović, je obrazložio, da je tačka AD-3 (po ovom pitanju) sa dvanaeste sjednice odložena za narednu sjednicu Administrativne komisije, do kada će se napraviti snimak raspoloživog prostora i potreba Klubova poslanika, kako bi Administrativna komisija ovo pitanje mogla razmatrati u skladu sa citiranim odredbama Poslovnika. Nadalje, u okviru ove tačke dnevnog reda, Novaković Momčilo je obavijestio Administrativnu komisiju, kao član Podkomisije formirane na 12-oj sjednici Administrativne komisije u okviru tačke Ad-8 (a), da će biti na službenom putu 10 dana, pa iz tih razloga traži, da ovu činjenicu Administrativna komisija uzme u obzir. U skladu sa nastalom situacijom i obavezama Podkomisije, ponudio je nekoliko po njemu mogućih rješenja. Prvo rješenje, za prevazilaženje nastale situacije je, da se umjesto njega u Podkomisiju imenuje drugi član Administrativne komisije. Drugo rješenje je, da Podkomisija obavi zadatak bez njegovog učešća, s tim da će on prihvatiti i potpisati odluku koju donese Podkomisija. Po završenom izlaganju Novaković Momčila, Vinko Zorić je postavio pitanje obaveza Podkomisije po tački III Odluke o formiranju Podkomisije Administrativne komisije broj:01/7-50-1-53-5-12/04. Izjavio je, da se priloženi računi uz njegov Zahtjev odnose na OSTALO, a da odijelo nije kupio, pa stoga smatra da Podkomisija nema šta umanjivati od priloženih računa za 50% jer se nijedan račun ne odnosi na ODIJELO. Istakao je, da on nevidi šta tu ima utvrđivati Podkomisija, kad je sve jasno po računima. Po završenom izlaganju Vinka Zorića, Novaković Močilo je postavio pitanje, koliko iznose računi priloženi uz Zahtjev. Pošto su stručne službe Sekretarijata informisale Administrativnu komisiju, da računi priloženi uz Zahtjev iznose 355,00 KM, po kursu na dan 02.06.2003 godine, Novaković Momčilo je predložio, da Administrativna komisija odmah donese Odluku o naknadi ostalih troškova sa službenog puta u inostranstvo, Vinku Zoriću. Svoj prijedlog je obrazložio, relativno malim iznosom u odnosu na troškove koji će nastati u vezi sa radom Podkomisije, a koji bi po njegovoj procjeni mogli biti veći od iznosa koji potražuje Vinko Zorić. Iz napred navedenih razloga je predložio, da se ovo pitanje riješi na današnjoj sjednici Administrativne komisije, a kojoj prisustvuju i članovi Podkomisije, budući da je po njemu Vinko Zorić upravo precizirao svoj Zahtjev, na taj način što je izjavio da ODIJELO nije kupio, već da se računi odnose na OSTALO. Sekretar Administrativne komisije je pokušao skrenuti dužnu pažnju na okolnosti vezane za ovaj slučaj, te smjernice za rad Podkomisije utvrđene na 12-oj sjednici Administrativne komisije, kad se radi o utvrđivanju nužnih i neophodnih troškova koji ulaze u troškove pod OSTALO nerealizovane nagodbe, ali joj je predsjedavajući oduzeo riječ. Predsjedavajući sjednicom Administrativne komisije, Jusufović Munib, je: imajući u vidu: prijedlog za rješenje ovog slučaja, koji je dao i obrazložio Novaković Momčilo, preciziran Zahtjev Vinka Zorića na samoj sjednici Administrativne komisije, cijeneći utvrđeni iznos računa u odnosu na eventualne troškove rada Podkomisije, dao na glasanje prijedlog Novaković Momčila. Imajući u vidu naprijed navedeno, Administrativna komisija je jednoglasno donijela

ODLUKU

o naknadi ostalih troškova sa službenog puta u inostranstvo

I

Vinku Zoriću, se priznaje iznos od 355,00 KM na ime ostalih troškova nastalih na službenom putu u inostranstvo, obavljenom u periodu od 01.06-06.06.2003, a koji su uzrokovani krajnjom nepažnjom radnika prijevoznika Lufthansa i posrednika Ambasade BiH u Parizu.

II

Za realizaciju ove Odluke zadužuje se Računovodstvo Sekretarijata Parlamentarne skupštine Bosne i Hercegovine.

Pošto su u okviru tački dnevnog reda, sa dvanaeste sjednice Administrativne komisije, raspravljena pitanja vezana za realizaciju odluka i zaključaka Administrativne komisije, predsjedavajući Munib Jusufović stavio je na glasanje Zapisnik sa 12-e sjednice Administrativne komisije. **Zapisnik sa 12-e sjednice Administrativne komisije, usvojen je jednoglasno bez primjedbi.**

AD-2 Po ovoj tački dnevnog reda, predsjedavajući sjednicom Administrativne komisije, Jusufović Munib, je pozvao Vedrana Hadžovića da objasni Odluku koju je donijela Komisija za finansijske i administrativne poslove Doma naroda dana 22.03.2004 godine. Vedran Hadžović je upoznao prisutne sa Odlukom broj: 02/3-50-1-236-14/04 od 22.03.2004 godine koju je donijela Komisija za finansijske i administrativne poslove Doma naroda, a koja je dostavljena u prilogu materijala za ovu sjednicu Administrativne komisije. Istakao je, da se u određivanju koeficijenata za obavljanje poslova i radnih zadataka za koje je predviđena SSS i VSS, nije vodilo računa o mjerilima za utvrđivanje istih, tj. nije se procjenjivala složenost poslova i radnih zadataka i stepenovala odgovornost između poslova i radnih zadataka koje obavljaju lica sa SSS u odnosu na poslove i zadatke koje obavljaju lica sa VSS, čime se na neki način stvorila određena uravnilovka koju treba otkloniti. Vedran Hadžović je naglasio, da se na ovo pitanje već duže vremena ukazuje i traži da se isprave nelogičnosti oko koeficijenata za ove dvije kategorije poslova i radnih zadataka, pa iz navedenih razloga smatra, da ga treba riješiti Administrativna komisija, imajući u vidu naprijed navedena mjerila za vrednovanje poslova i radnih zadataka. Imenovani je posebno naglasio, da je dužan upozoriti Administrativnu komisiju na član 5 i 43 Zakona o državnoj službi u institucijama Bosne i Hercegovine ("Sl. glasnik BiH" br.:19/02 i 35/03) koji utvrđuju plaću savjetnika vezujući je za plaću pomoćnika ministra iz petog platnog razreda. **U skladu sa naprijed navedenim zakonskim odredbama, Vedran Hadžović je naglasio, da plate savjetnika treba uskladiti sa Zakonom, te da koeficijente vezane za savjetnike u Odluci treba uskladiti sa članom 43 Zakona. Nadalje je naglasio, da ovu zakonsku odredbu treba unijeti u Odluku o izmjenama Odluke o izmjenama Pravilnika o plaćama i naknadama državnih službenika i zaposlenika u Sekretarijatu Parlamentarne skupštine Bosne i Hercegovine, broj: 01,02/03-02-432/01 od 03. jula 2001 godine, kao član 2 iste.** Nakon izlaganja Vedrana Hadžovića i upozorenja na poštivanje zakonskih odredbi, koje uređuju pitanje plaća savjetnika, za riječ se javio Vinko Zorić. Istakao je, da je analogno zakonskoj odredbi plaća savjetnika izjednačena sa plaćom pomoćnika ministra u stvari jedanaka plaći koju imaju poslanici u Predstavničkom domu Parlamentarne skupštine Bosne i Hercegovine. Pita je, po kojem se koeficijentu obračunava plaća pomoćnicima ministra. Vedran Hadžović ga je informisao, da je koeficijent za obračun plaće pomoćnika ministra 4,7. Imajući u vidu da je, Komisija za finansijske i administrativne poslove Doma naroda donijela 22.03.2004 godine Odluku koja je na dnevnom redu 13-e vanredne sjednice, predsjedavajući Jusufović Munib je prekinuo dalju raspravu po ovom pitanju, dajući konstruktivan prijedlog-da se pitanja koja su pokrenuta na današnjoj sjednici Administrativne komisije rasprave i usklade na zajedničkoj sjednici Kolegija obe komisije, a da se na 13-oj vanrednoj sjednici Administrativne komisije usvoji Odluka o izmjenama Odluke o izmjenama Pravilnika o plaćama i naknadama državnih službenika i zaposlenika u Sekretarijatu Parlamentarne skupštine Bosne i Hercegovine, broj: 01,02/03-02-432/01 od 03. jula 2001 godine, **u istovjetnom tekstu** kao Odluka Komisije za finansijske i administrativne poslove Doma naroda. Prijedlog je dat na glasanje. Nakon provedenog glasanja Administrativna komisija **je jednoglasno usvojila:**

ZAKLJUČAK

I - Obavezuje se Kolegij Administrativne komisije Predstavničkog doma, da zajedno sa Kolegijem Komisije za finansijske i administrativne poslove Doma naroda Parlamentarne skupštine Bosne i Hercegovine, raspravi i usaglasi pitanje vrednovanja poslova i radnih zadataka SSS i VSS, te usaglasi plaće savjetnika sa članom 43 Zakona o državnoj službi u institucijama Bosne i Hercegovine ("Sl. glasnik BiH" br.: 19/02 i 35/03).

i jednoglasno donijela,

ODLUKU

o izmjenama Odluke o izmjenama Pravilnika o plaćama i naknadama državnih službenika i zaposlenika u Sekretarijatu Parlamentarne skupštine Bosne i Hercegovine, broj:01,02/3-02-432/01 od 03. jula 2001 godine.

Član 1.

Član 1. Odluke o izmjenama Pravilnika o plaćama i naknadama državnih službenika i zaposlenika u Sekretarijatu Parlamentarne skupštine BiH mijenja se i glasi:

Koeficijenti za obračun plaća, funkcionera, savjetnika, državnih službenika i zaposlenika su:

Platni razred	Unapređenje	Kategorija uposlenih	Koeficijent
IV		Funkcioneri (sekretari domova i sekretar Zajedničke službe	6,00
III	I	Rukovodeći državni služ.i savjetnici	5,50
III	II	Rukovodeći državni službenici	5,20
III	III	Rukovodeći državni službenici	4,80
II	I	Državni službenici- Viši stručni saradnici	4,80
II	II	Državni službenici- Viši stručni saradnici	4,50
II	III	Državni službenici- Viši stručni saradnici	4,20
I	I	Državni službenici- Stručni saradnici	4,20
I	II	Državni službenici- Stručni saradnici	3,80
I	III	Državni službenici- Stručni saradnici	3,50

Platni razred	Kategorija uposlenih	Koeficijent
IV	Zaposlenici	3,50
III	Zaposlenici	3,20
II	Zaposlenici	2,80
I	Zaposlenici	1,90

Član 2.

Odluka o izmjenama Odluke o izmjenama Pravilnika o plaćama i naknadama državnih službenika i zaposlenika u Sekretarijatu Parlamentarne skupštine BiH stupa na snagu danom donošenja, a primjenjivat će se od 01.03.2004.godine.

AD-3 Po ovoj tački dnevnog reda obrazloženje je dao Vedran Hadžović. Informisao je prisutne, da se računi iz 2001 godine odnose na period prije donošenja Odluke o izmjenama i dopunama Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine broj: 01/7,02/3-02-439/01 od 03. jula 2001 godine, kojom je uvedeno limitiranje iznosa za noćenje na 100 KM. Imajući u vidu naprijed navedeno predložio je, da Administrativna komisija donese Odluku o izmirenju obaveza iz 2001 godine prema Hotelu "Holiday Inn". Pošto je razjašnjeno pitanje limitiranja iznosa za noćenje na 100 KM, u odnosu na priložene račune Hotela "Holiday Inn" koji se odnose na period prije donošenja citirane Odluke, **Administrativna komisija je jednoglasno donijela:**

ODLUKU

o izmirenju obaveza prema Hotelu "Holiday Inn"

I

Odobrava se iznos od 1.483,00 KM na ime izmirenja obaveza iz 2001 godine prema Hotelu "Holiday Inn", a prema računima br.:0123 od 23.02.2001 godine; br.: 0161 od 07.03.2001 godine i br.: 0121 od 20.02.2001 godine.

II

Za realizaciju ove Odluke zadužuje se Računovodstvo Sekretarijata Parlamentarne skupštine Bosne i Hercegovine.

Trinaesta vanredna sjednica, Administrativne komisije Predstavničkog doma Parlamentarne skupštine Bosne i Hercegovine, završena je u 15 sati.

Sekretar
Administrativne komisije
Davorka Čaplinski

Predsjedavajući
Administrativne komisije
Munib Jusufović